

**Uunga siunnersuut: Nalunaaquttap aalajangersarneqarnera pillugu Inatsisartut  
inatsisaat**

*Naalakkersuisut Siulittaasuannit saqqummiunneqartoq*

**pillugu**

**Inatsisinut Ataatsimiititaliap**

**siunnersuutip aappassaaneerneqarneranut**

**ILASSUTITUT ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, siulittaasoq  
 Inatsisartunut ilaasortaq Aqqalu Jerimiassen, Atassut, siulittaasup tullia  
 Inatsisartunut ilaasortaq Najaaraq Møller, Siumut  
 Inatsisartunut ilaasortaq Harald Bianco, Inuit Ataqatigiit  
 Inatsisartunut ilaasortaq Asii Chemnitz Narup, Inuit Ataqatigiit

Siunnersuut ulloq 10. november 2022-mi aappassaaniigassanngortinneqarpoq. Siunnersuutip aappassaaneerneqarnerani inersuarmi isumaqatigiinniarneq unitsinneqarpoq. Aappassaaneerinninnerup ingerlateqqinnejarnnginnerani siunnersuut ataatsimiititaliamit suliarineqaqqittussanngorlugu innersuunneqarpoq.

**Siunnersuutip Inatsisartunit aappassaaneerneqarnera**

Siunnersuutip peqqinnissakkut kingunerisassaasa naammattumik paasinarsisisinneqarsimannnginnerat siunnersuummik aappassaaneerinninnermi oqaatigineqarpoq. Tamanna tunngavigalugu siunnersuutip ataatsimiititaliamit suliareqqinnejarnissaa Inatsisartunit kissaatigineqarpoq.

**Ataatsimiititaliap siunnersuummik suliarinninnera**

Ullup qaamarngata allanngortinneqarnissaanik siunnersuutip innuttaasut peqqissusiannut qanoq kinguneqarnissaa siunnersuummik aappassaaneerinninnissaq sioqqullugu isumaliutissiissusiornermut atatillugu ataatsimiititaliap Naalakkersuisunut apeqqutigaa. Tamatumunnga Naalakkersuisup akipput Naalakkersuisut tamanna pillugu immikkut misissuisimanngitsut.

Ataatsimiititaliap siunnersuummik suliaqarnerminut atatillugu Nunatsinni Ilisimatusarermik Siunnersuisoqatigiinni ilaasortaq attaveqarfigaat. Siunnersuisoqatigiinnut ilaasortaq ataatsimiititaliamut ima ilisimatitsissuteqarpoq:

- Kalaallit Nunaanni qaamasarnerata qanoq isumatsannermik malitseqarsinnaaneranut tunngasumik misissuisoqarnikuovoq. Misissuinerup inerneraa, avannarparteriartornermi isumatsattarnerit takussaaneruleriartortartut. Aammattaaq misissuinerup takutippaa, ukiumi kaperlannerata sivisussusaa sapaatip akunneri quliunersut 14-iunersulluunniit ukiuunerani isumatsattarnermut apeqquaanatik inernerit assigiipajaaginnartut.
- Tarnikkut nappaatilinnut immikkoortortaqarfimmiiitaaq qaamaneq atorlugu isumatsannermut katsorsartinnissaq neqeroorutigineqartarnikuunera tassungalu ilaatinneqarluni katsorsartinnerup ingerlanerata nalilorsorneqarnera.
- Aammattaaq aasaanerani ukiuuneranilu d-vitamininit pillugit misissuisoqarnikuovoq.
- Kiisalu UV-mik qinngornerit pillugit aamma misissuisoqarnikuulluni .


Siunnersuisoqatigiinnut ilaasortap paassisutissiissutigaa, piffissaq sivisunerusoq qaangiukkaangat aasaanerani ukiuuneranilu, qaamasarnerata taartarneratalu assigiinnginnerpaaffianni, qaamasarnerata assigiinngissutaasa sunniutigisinnaasaanut tunngasut, misissuinerni ukunani eqqaaneqartuni isiginiarneqartut. Nalunaaquittap malinneqartup allanngortinneratigut aasaanerani ukiuuneranilu qaamasarnerata assigiinngissusaat annertuumik sunniuteqassangatinneqanngilaq, naak taamak ilimagisaqarluni misissuinerni qulaani eqqaaneqartuni misissuisoqarsimagaluartoq. Kalaallit Nunaata avannarpasissumi inisisimanera peqqutaalluni, assersuutigalugu Kalaallit Nunaata avannaani ukiuunerani qaamasarnera taartarneralu peqqissutsimut sunniuteqartussaanngilaq.

### **Ataatsimiititaliap inassuteqaatai**

Atuutsitsilernermi aasaanerani nalunaaquittap malikkunnaarnissaanik kissaateqarneq siullermeerininnermi partiinit amerlanernit oqariartutigineqarnera ataatsimiititaliap maluginiarpaa. Imaassinnaasoq nalunaaquittap Kalaallit Nunaanni malinneqartup UTC -2 -mut allanngortinneratigut kingunerisassai taamaaliornikkut annikillisinneqartut.

Taama oqaaseqarluni ataatsimiititaliap isumaqatigiissup siunnersuut akuerisassangortippaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Anders Olsen  
Siulittaasoq



Aqqalu Jerimiassen  
Siulittaasup tullia



Najaaraq Møller



Harald Bianco



Asii Chemnitz Narup